

奇

觚

廩

文

集

奇觚廣文外集

長洲葉昌熾

費幼亭廉訪六十壽序

代

歲在著雍困敦律中蕤賓之月我幼亭廉訪六十攬揆之辰  
鄉士大夫走書都下徵文爲壽惟君茵馮門資薰習庭誥尊  
甫耕亭先生儒林丈人中州循吏先公以賈生射策之年預  
侯芭問奇之列孔融半刺合署通家商瞿一經猶懷舊學息  
君筮仕畿臺策勳海徼功在社稷名達朝廷某時備員京  
卿飫聞魁烈今國家東撫開極西綏燾靡南諧孫樸北燮  
禹疆滄海之波不揚靈臺之草已偃呂梁旣濟思作楫之功  
虞淵不沈論搗戈之效可無一言以侑觴乎蓋君佩鰈之年

卽負請纓之略耕亭先生報最洛陽儲糧閩嶠當封軺行部  
之時正籌筆登樓之日無何星實旄頭風哀鈴角寢邱廉吏  
無負郭之田稷下名臣有鑿楹之訓君奉諱杜門食貧賃廡  
沈冥下帷藜牀銳而將穿孟晉發篋巖蒸施而復續僉謂威  
鳳絢日千仞非遙良驥籥雲九衢可騁而乃幽蘭不馨垂棘  
非耀雖上蘇季之書卒下劉蕡之第當斯時也赤眉充路白  
羽橫江縑緇裂爲帷囊梔豆夷於兵燹君乘櫬遠出複壁深  
藏往往祭竈請鄰祀他鄉之臘論兵結客笑築室之謀蓋君  
於是知章句不可以匡時絃纓不可以經世曼胡韜衽非寬  
博所狎長戟鉤鏃非委蛇所攻遂迺投袂焚書臨觴撫劒渡  
中流而擊楫臨左輔以彈冠起家百里需次暮年卽邁北堂

之憂重返東山之服維時向忠武公躡賊東下駐師白門當  
道非羆臨巢搏虎君入幕運籌汎舟輸粟短後從軍之服高  
前卻敵之冠鳴鏑報警則絕韉宵馳磨盾揮毫則飛書晝發  
旣而大帥騎箕豎儒握柄宋義視師但置酒而高會殷浩束  
閣且仰屋而書空君喟然曰是積薪而厝火也是折輦以安  
巢也危牆非知命所立惡木非見機所棲於是脫屣膠舟褰  
裳濡軌顧以原官聽鼓直省咸豐九年補懷來令據席未煖  
卽奉簡書枕戈方殷遑云簿領蓋君經文緯武之略長駕遠  
馭之才飛箱抵巇之謀搏力羸口之法實顯於此當海疆之  
棘也彤鴈甫集海水羣飛門關洞開巖疆何險列燧警於長  
楊衝車屯於細柳天子以列郡沸羹生民塗炭元戎長轂

出而三驅大農算輶謁於九府雖有方召之臣衛霍之將皆以鞭長莫及磬控難施於是恕其吠堯之罪許以歸漢之誠灑血將盟磨牙又噬兩甄之鼓忽鳴三軍之士盡墨或謂長鯨必翦獠犬難馴與其縱敵以養癰曷若勒兵而決勝維時恭親王以天潢懿親總視師干謂欲整我六師必先通夫一介求可以使絕域折強鄰如古常惠傳介子者非君莫屬遂乃持節登車摩旌叩壘鄭弦高之餌敵藉用乘韋晉趙武之蒞盟何憂衷甲雖當交鉞映雪蜚旛崩雷鵠舌鬬爭蛇涎巧蠱而君神觀不撓詞鋒愈峻恍以利害曉以順逆折以曲直示以恩威從容杯酒之交折衝尊俎之上卒使歸身請吏厥角稱臣投戈而受約束折箸以釋猜嫌鑿凶門而出一軍皆

驚馳吉語而歸羣酋亦拜說者謂是役也變出非常攻當無  
備棘門霸上非無傾國之師期門羽林亦有良家之子然而  
投鼠不免忌器穴蟻足以潰隄元臣束手老將撫髀而君以  
抗塵之吏收砥柱之功名聲達於九重勲伐照於四裔狂  
瀾不倒磐石愈安不其偉歟從此海受主知疊膺民祉辛  
酉補南皮令浮瓜沈李溯嘉會於朱炎拔薤除稂流循名於  
紫禁遂以上考移劇長安同治元年九月授天津府書屏姓  
字出自破格之恩扶杖謳歌重到立功之地津郡地控黃圖  
壤鄰碧澥梯航互市冠蓋交衝君簪帷所至清風先翔桐鼓  
雖平餘威猶震洵二千石之良亦廿七最之首矣癸亥調保  
定府丁卯擢清河道逾年捻逆張總愚渡惡池而北省城戒

嚴民無固心士皆虛伍驅羸卒以成行望敵氛而甚惡抑且  
 露積皆空冰稜如削朔風捲旆挾纜不溫霑雨載途飛芻莫  
 達君謂枵腹不可登陴空拳何能陷壘遂移河東之粟以濟  
 薊北之軍唱月量沙披星設械嚴城列雉恍來突起之軍空  
 幕啼烏早褫袂徒之魄事平論功復膺懋賞庚午署直隸  
 按察使六條察吏三宥亭民朝廷鑒其奇才將畀疆奇方  
 謂屏翰之績比肩甫申謨諧之勳繼踵檇戢而君成功不居  
 盛德若谷秋風江上解組去官春日堂前吹笙奉母惟是薄  
 宦廿年清操兩葉不改懸魚之素并無旋馬之居賃廡舉亭  
 舞衣萊室虞山之麓先塋在焉丹楓醉谷列幃爲城蒼蘚被  
 崖懸泉作界破山古寺詩人題壁之場拂水荒巖遺老藏書

之窟君欲築屋買田杜埤研陌守疏廣止足之戒以樂餘年  
師桓榮稽古之言以勸後進江陰南菁書院者前學使瑞安  
黃公所勗也雷次宗之築舍胡安定之分齋廣廈庇寒匠門  
翹秀君謂鼓篋官學難問米鹽脂車登途豈無齋斧苟非厚  
以餼糧安能呻其佔畢遂乃分一勺之廉泉割千鍾之腴壤  
將以作育人文奮興多士蓋君案牘賢勞本好樸學兵戈方  
亟閒事雅歌是以哲嗣屺懷世講發明絕業刊落野言以服  
孔爲先河洞鄭王之流別四部七略伏案能通兩京三都濡  
毫立就莫非揚權庭聞胚胎家學今者天鏡澄文地槃翕采  
德日曜野景風被和晝錦名堂康觚溢戶行見傳巖良弼再  
施霖雨之功鄺井延齡共上卿雲之頌



劉太師母荆淑人七旬壽序

光緒二年歲在丙子昌熾與我夫子永詩先生同舉於鄉越十有二年戊子爲我太師母荆太淑人七十上壽同年生謀稱觴爲壽僉謂昌熾昔侍禮堂備聞壺教孟母斷機之訓得自子與莒女舒櫛之箴傳於中壘盍爲一言以蘄綽綰乎夫勒跡槐肩剡泉鞠井綺蔥琅菜行海上之籌芬樹荔華奏房中之曲牕窺朱鳥星妃控月而來輦馭斑駁雲母乘鸞而至此皆鑒空之詞無當祝延之義則請以德象之篇爲壽考之頌我太師母姑惟燕產媯卜陳昌當翦髮而爲羈卽善心之爲竊舉凡五醞燔炮之品九華纂組之功慧解羣經精思獨誦其尊人梅伯先生滇池廉吏鄂渚寄公神光夜見祀徼外

之碧雞津吏晨迎沂江中之青翰太師母萬里從行十年待  
字旣而梅伯先生之官吳下慈惠稱師以晉筦庫之家爲漢  
循良之吏案牘有暇閒事雅歌車旗所臨輒訪佳士我太夫  
子嚴徐妙選終賈盛年官閣論文壻鄉委摯當斯時也朱門  
百兩于歸宋子之家紺幘三重共說蔣侯之妹鳴環習禮織  
錦貽詩北堂榛栗纓佩偕陳南湖蘋繁篚筐用執固已弋鳧  
交警雌雁和鳴矣然而蘭芷之馨得勁風而始升松柏之操  
因集霰而逾茂當夫桓車共挽梁廡偕春太夫子乞米療貧  
糲麻苦讀雖以君山之積學不免臣朔之苦飢加以射鏑頻  
來乘櫬出走禿管三寸家具一車避地雒水之濱受塵蠚機  
之上往往日影穿牖竈突未黔風聲在林樵埋忽警太師母

屬當流離之日益矢黽勉之猷煩擱苛鬱端操肅雖故是時  
 縑緇裂爲帷囊梔豆夷爲兵燹儒林丈人學官弟子或託杜  
 根之傭保或逐刁閑之貿遷而太夫子猶復家守青瑣里開  
 絳帳惜計車而上道啟複壁而藏書永詩先生雅賓先生並  
 以永嘉流寓爲高密大師昌熾舞象之年奉手受教劉璣檀  
 橋之館近在比鄰王通汾曲之堂不踰數武挾書就塾載酒  
 過牆爰從撰杖之餘得窺折筭之教竊歎昔人所稱高行女  
 宗殆無以過也旣而國難削平家祥淳至自同治戊辰以逮  
 甲戌太夫子及雅賓先生先後入詞林永詩先生亦以丁卯  
 優貢南闈報捷承明著作之選聚於一門鄉閭賢能之書必  
 先六行暨甲申歲太夫子特奉 簡命視學浙中持節過家

封輶行部太師母繡衣翬翟榮於石卵之封瑜珥瑤環先慰  
璇閨之樂 國恩之烏奕家慶之蟬焉斯爲盛矣斯爲美矣  
而太師母持盈保泰處貴遺榮庭有懸縑家靡垂珥抑且朋  
簪談藝分賢母之盤飧嬪息銘恩費太君之刀尺百家待以  
舉火九族丐其餘波其尤難者梅伯先生暮年卒官德配梁  
太孺人庚申之變避寇告殂太師母鸞釧營葬脫簪盡哀至  
今皋光之閒佳城鬱葱螭頭三尺苔蘚如新馬鬣一坏松楸  
無恙鍾儀郝法班誠張箴以今方古何多讓焉今者葭灰吹  
律一綫長贏黃酒開尊九疇皆備卜延齡之彌永信食報之  
方長昌熾鄭門著錄竊附臚模許氏設科幸隨王吉用敢以  
赤心之管介黃髮之觴惟冀韋逞傳經早識宣文之學奚斯

作頌請廣壽母之詩

潘伯寅尙書六十壽序

代

謹案孫氏瑞應圖曰神鼎者質文精也巫錦營旁之禮其地如鉤留珪門內之光天錫之瑞栴邑旂鸞康宮攸勒鄮縣所出在於赤烏之年章山所登在於元嘉之世郡國山川貢此奇珍朝廷郊祀播爲樂府良以蔑厯紀庸愷能降旅靳綰綽者德之徵黉保燕者福之符不有偉坊曷膺嘉祉惟我鄭僉官太保尙書經緯馮生鑄銘邃古禱賤挺生禹皋寅亮堯典舜典有廟堂之述作申侯甫侯爲嵩嶽所生神公以爲父丁祖乙立矢執旗雷雨甲山遠協義爰壺戈蛟蚪上承皇史足以是正文字辯章典經箴斯邈之膏肓作倉籀之羽翼是以

亨陽庸器遠搜三代佉羅貞珉不限八荒柏寢遺文槐眉奇  
跡氈帷紛集金薤交披頡密事君鍾惟邵伯之子敬奮命汝  
鼎爲南公之孫夏承漢碑徐勉梁碣並皆經世鴻寶海內稱  
詫惟光緒十有五年歲在己丑十月初七日爲公六十攬揆  
之辰先是公適得周鼎一銅花蝕腹皆雲雷之篆文析木象  
形比函黃之宗器續庸乃命有取於重申胡輦之倫盡退而  
居乙師餘師旦叔夜叔單戈扶各鄰陶陵好時遠而辭趙所  
著錄近而阮劉所收藏凡厥攸彝等諸自檜是固希世之珍  
足當延年之祝蓋是鼎也克作善夫王呼尹氏出內厥命一  
再言焉案藝文類聚引百官表曰尙書文章天府總攝諸曹  
出納王命敷奏萬機又引王昶考課事曰尙書侍中進視惟

允以掌讜言出納王命以考賦政又引漢揚雄尙書箴曰龍  
惟納言是機是密出入王命王之喉舌稽之往牒則如彼攷  
之古器則如此其爲休嘉夫何疑乎則試揚榘銘詞搜張偉  
伐公早踐清華一參機密洊登九列數厯三朝密勿論思  
翼爲襄贊啟心沃心商巖舟楫之材禮典刑典周官妣亮之  
任每當國是安危人材消長盡言無隱亭立不阿巖巖之象  
泰岱皆宗侃侃而談朝廷動色鼎名有曰龔保乃辟龔王  
諫辟惟公有焉公校書東觀簪筆西清佚任纂言陟咸勵學  
虞廷庶績交慶夫明良卷阿矢音克諧夫雅頌南齋地  
近蓬壺天臨華蓋高文宏達羣推大雅之才講幄深巖密  
邇延英之地往往披衣晨直起視明星撤燭宵歸渥承湛

露 宮廷螭扁非韋誕不能書柱下方書必張蒼而可讀宣

勞者三十餘載應 制者數百萬言鼎名有曰夙夜用事勿

濫朕命惟公有焉京師首善之區古稱三輔擊轂通衢探丸  
伏莽今制設順天府尹欲以親重大臣兼管尹事公入參

禁幄出掌郊圻周召方伯實尊分陝之司蕭曹勳臣亦以獄

市爲寄每當暑雨怨咨水旱昏墊視民在宥若已納隍飢溺

塵后稷之懷保釐亦畢公之職鼎文有曰保辟周邦峻及四

方惟公有焉三代以前君臣同契呼史宣綸命官作冊錫申

伯者但有介圭予晉侯者惟聞鞶帶 奎章疊賁 異數便

蕃 福壽平安 直良功順丹青拜 賜盡娥姁之徽猷縹

碧留 題亦夷夔之依永范公石湖史氏碧沚千載隆遇不



嘗過之鼎名有日對揚天子丕顯魯休惟公有焉至經嬴濟  
美纓組傳家冠蓋清第詩人資以立言令僕世系史家爲之  
作表此則永寶用言之常辭錫釐無疆之至意公爲餘事非  
所以稱娛已夫饋餽小敦願至萬年榮蔭常鉏必斲三壽鉤  
有長生之號壺以大吉爲名況乎梟巢遺模虎雖比物不先  
不後出於其時是猶召伯虎之有敦仲山甫之有鼎豈不足  
用妥眉象斲句唐虞乎某等橫海屯兵直沽練士屬以青龍  
之役得隨蒼兕之官剡牘濫膺綵觴遙祝金松綺柏何取肇  
輓之詞樂石吉金同上期頤之頌

潘伯寅師六十壽序

粵稽六麟服路之代五鳳調元之年邛化旁流庶績伊喜必

有恭肅將明之臣以宏天保孔固之業其在 聖清則有儀  
徵阮文達公冠冕人倫經緯禮俗名位文章罕與疇比惟我  
鄭盦宮太保尙書夫子早登東觀久直 南齋敷歷 三朝  
游膺九列維申及甫繼周召之元勳若禹皋陶襄唐虞之盛  
業今 皇上龍飛十有五載十月初吉爲我夫子六十壽辰  
門下士思所以侑觴者昌熾竊惟我夫子闡明絕學宏獎羣  
彥海內士流奉爲職志宜與文達後先輝映用敢摭拾遺文  
導揚盛美雲臺先生而後實紹斯文雷塘弟子之書庶幾實  
錄文達中祕校書 上方賜食 石渠寶笈 祕殿珠林奉  
敕編摩賡歌喜起可謂儒臣之榮遇詞苑之雅談我夫子  
紬書 懋勤之殿校帖 敬勝之齋 交泰鐘聲 重華茶

宴虎觀坐論紺煙襲衣鸞鑾揮毫華月升席訓詞爾雅枚馬  
應制之篇正定可傳歆向校讎之略此其稽古之榮同揆一  
也文達嘉慶己未道光癸巳兩典禮闈號稱得士閩陳壽祺  
歆程祖洛全椒吳鼐嘉應宋湘武進張惠言德清許宗彥高  
郵王文簡公歸安姚文僖公並以命世之才筮彙征之吉我  
夫子標穎拔萃揚滯飛翹中正九品貢舉四科凡所簡拔必  
先樸學膠庠賢能之貢適者有功場屋速化之習幡然丕變  
此其得士之盛同揆一也文達儒林丈人聖門宗子性命古  
訓易彖意音攷工車制之圖大學格物之說上究天人旁甄  
名物自宋以來野言曲說廓清摧陷比於武事我夫子謂讀  
書必先識字爲學在於通經平生服膺尤在精密趙商張逸

孫皓吳模比於鄭門宜爲同賜西京博士之業能識條流南  
閣祭酒之書先明聲義此其尊古之學同揆一也文達多識  
舊聞練習掌故 國史儒林疇人子弟定香亭畔筆記能詳  
文樓巷中墨莊可攷我夫子家世鼎貴宏覽多聞 朝廷典  
章里巷故實莫不目識掌錄條貫靡遺褒衣議禮定叔孫之  
朝儀廣座清言盡文公之談苑此其徵今之學同揆一也文  
達家有曹倉樓儲蕭選經雕十行之本注校一字之訛湖上  
書藏詔四方以來觀郡齋解題補七閣所未備我夫子漁仲  
八求孝緒七錄分厘百宋移架千元溫公獨樂之園宋氏春  
明之第上黨仲子不祕隱秀一篇倦圃老人惟以流通爲意  
此其書籍之癖同揆一也文達隄廩之銅媵置焦山上陽之

鍾嘉薦祐室至若雍岐十碣泰華雙碑或付重開或矜孤本  
商周銅器之識積成三篇 皇清碑版之錄猶存一序我夫  
子撫逸三古撫奇八荒南公一鼎邵公十鍾漢魏碑版隋唐  
造象鑒別之精遠過張敞鄭眾奔藏之富不數雷堂大臨此  
其金石之好同揆一也文達渥膺 異數迭賁 奎章 原  
教 養心之文 亮功錫祐之額冬朝述職 春帖紀 恩  
錫賚便蕃形於歌詠我夫子倬直 內廷拜嘉 宸翰 直  
良功順 福壽平安 律應鈞天 句錫鐘鏞之奏 文承  
復旦 恩頒黼黻之華此其拜 天貺者同揆一也文達於  
嘉慶七年浙西饑疏請蠲豁平糶二十一年總制湖廣建范  
家隄以蘇水患海塘臨要鹽池 難荊州窖金硤川賁賑至

今人民猶歌遺愛我夫子兼尹京畿勤恤氓隱逢堯湯之  
水旱塵禹稷之焦勞乞糴汎舟指囷割俸膏而南國民懷召  
伯之思保釐東郊史紀畢公之績此其恤民瘼者同揆一也  
至於振獎寒素汲引俊髦降白屋以禮賢呼蒼昊以薦士一  
言偶契附以羽毛千里雖遙藏諸寤寐州郡後進巖谷畸人  
瞻若泰山歸如流水以視文達之得嚴江臧願諸賢未爲多  
讓昌熾平津舊客匠門棄材辱以文字得苟盼睐辛彝癸卣  
遍採積古之齋玉踐金題曾入瑯嬛之館幸得文達並世以  
爲之師可無一言以祝三壽謨猷襄贊並居熙朝元輔之  
班福壽日增請誦當日聖人之祝

王母陳太宜人七十壽序

喬木磔硤凌寒霰而不凋貞蕤鬱芬扇疾風而愈勁自來煒  
管所書闕闕之行煩擱苛鬱遂筮甘節黍谷之律忽變奇溫  
雍門之琴奚煩噍殺然而方舟所驚必溯謨觴翟第旣膺丹  
忘壓綫則論祝延之義或無取於舛飾之詞乎我同年王栩  
緣君幼稟慈訓長益鏃厲旣賦遠游之篇遂讀中祕之籍歲  
在辛卯季春之月爲其太君陳太宜人七十上壽昌熾哀樂  
迭經苦甘共喻譬之閉門造車出門合轍燕雀交賀爲漂搖  
之已更夔蜺相憐亦肖翹所同病敬陳一言庶非揣籥蓋太  
宜人婉變在室端操有蹤經史大義略能甄綜有嫺著姓本  
出虞宗爲姑相攸莫如韓樂年二十四作嬪琅邪我年丈魯  
山先生家世寒素覃精儒業上奉兩親下懷同氣太宜人簪

燈助讀脫珥營餐祿飾精粲一不自私以故灋東灋西雖無  
負郭之區道南道北猶挹監河之潤庭闈怡懌里鄙稱歎既  
而揭竿驟驚乘櫬潛遁繞樹三市歎飛鵲之何依伏莽四呼  
方瞻烏而靡定往往青坂霜吟紺宮露宿繩牀土銕逾細旃  
之安巾卷囊琴以懷璧爲罪菰蘆奔竄逢津吏而誰何苜蓿  
闌干呼牧童而進講海上一隅寄公所萃年丈奉母閒關先  
脫虎口弱小留鄉以須後命太宜人擘絮履霜牽蘿障雨拾  
松作爨斧以斯之養糲爲糧餅之罄矣然猶鍵戶課子不廢  
佔嗶登山望夫時詠橐砧迨夫毀室復完荒徑無恙井闔言  
復賃廡偕春城闕不刺登堂肆簡從游旣眾與太宜人分而  
課之絃誦之聲徹於柵外泰誓逸篇發自河內女子宣文講



學不愧儒林丈人方謂佩黻何榮寒飈可守而庚午之歲龍蛇遽兆乙亥以後長公銘之茂才又以劬學失明當斯時也焚焉弱息耄矣偏親太宜人母可爲師婦以代子鑿楹而視發青箱之篇循陔以養繼白華之職遂使秋霜載儒克懷先志春暉將戾得盡餘年雖古中壘所稱何以加焉棚緣屬當操縵之年卽有請纓之志惟時梁溪李太守金鏞從同郡吳公大徵治師雞林貽書敦召議者僉以穹廬甌脫非人所居朔漠苦寒堅冰墮指相顧客且無勸駕者而太宜人獨謂山川登眺可備九能絕域見聞亦資掌錄欣然治裝輒道神而遣之明年復從吳公於甯古塔醫閭絕頂言登望海之堂息憊舊墟遂歷長城之窟短策馬健卒韉鷹艸幕下之箋補

柳邊之略及吳公移節海南宣房河上而栩緣亦以己丑成進士入翰林諸兄亦籌筆戎幕策名薦刻板輿迎養稱觴京邸折蓂之訓旣彰茹檠之心斯慰昌熾龍鬚之年侍親避地牽衣攔道或弟妹之相呼煎紙煇湯有友朋之來慰回首嚮曩惕焉夢寐則與栩緣所處之境此一同也長雖就傅而墮衣晨誦挑燈宵讀吾母實親督之束脩十銖取給鍼黹牝雞百錢持鬻故紙其後負米四方屢更府主每一歸省席不暇煖此與栩緣所處之境又一同也二毛斑矣甫通朝籍祿不逮養惻惻幸存則視栩緣有餘愧矣今而知栩緣天倫之樂爲不可及而太宜人綽綽之祥亦未有艾也爰卽勞者之歌以當壽人之曲庶幾京陵家內常師東海儀型豈厯安世房

中可續唐山雅奏

吳憲齋中丞六十壽序

代

三代彝器若張仲之簠召虎之敦仲山甫之鼎虢叔巖翼以  
鑄酥鐘曾伯愬聖迺銘旅簠琕戈旂鸞辨美陽之釋文中鼎  
攸勒承酥門之分器皆以論譔塢烈恢章全圖而其詞不曰  
降旅多福卽曰眉壽無期不曰屯太康虔卽曰通彖永命蓋  
惟唐虞之主岳牧之輔君明臣良克綽永福徐幹所謂王澤  
之壽聲聞之壽仁者之壽其得而兼之矣惟歲在甲午日躔  
鵠首爲我表兄憲齋中丞六十攬揆之辰君起家詞館淳領  
璽圻其閒持節秦隴汎舟畿輔枕舍傳造瞻馬首而肅拜都  
亭流亡澹魴尾而言旋維時天子以東北三省國之門戶

聖世龍興強鄰虎視

命公以樓船橫海之師爲充國營

田之策彈壓巖壘馳驅朔徼醫閭絕頂首登望海之堂息愼  
故墟周歷長城之窟樺船納費來魚皮之氓銅柱鐫銘定犬  
牙之界旣而疆理南紀宣房東河鋒車所至清風先翔礎石  
旣下黃流順軌遭憂服除遂拜湖南巡撫之命惟君文揆  
武奮庸勛赫昭方且配蹤元凱爲國碩輔祝延之士莫不撫  
公偉略垂示將來而某某黜黷之歲卽同就傅重以肺腑投  
分益密竊謂公之數歷海內聞知惟夫六書之學精詣造極  
上窺頡誦俯揖籀斯則元亭擬易得桓譚而後知涑水纂言  
惟道原爲能讀先大夫與贈公補堂先生爲僚壻外王父韓  
履齋先生寶鐵齋尊彝圖籍甲於吳下君孺染緒論夙有神

解通籍以後宦轍所至豐岐故都京洛舊壤汾陰寶鼎發神  
燿之夜光汧隴古碑隨耕犁而出土輶軒奉使羶椎自攜古  
寺空巖褰帷周覽往往一字之獲等於珠船一器之值兼金  
無恡並世通人若吳縣潘文勤師濰縣陳簠齋丈皆以宏覽  
博物富於藏弃片紙餉遺不遠千里隻義詰難動輒萬言君  
爲摹其圖狀附以釋文雲雷之紋析若毫髮辨其痕肘輒至  
沒字畏龔威忌補周誥之逸文銑于鼓鉦詳攷工之遺範於  
是撰恆軒吉金錄若干卷君又謂孔壁殘經遭周季之變亂  
許氏古籀亦秦燔所子遺壇山吉日之文汲冢紀年之策非  
復保氏所掌闕里之舊至若旁喜凡將更佚不傳呂辭諸家  
徒爲目論恕先汧簡英公隸以四聲延陵墓碑蕭定刊其十

字其形則蠶尾懸鉞其器則郢書燕說嚮壁虛造貽誤來學  
君乃集古器文字身許書部居列圖孳乳繇簡並存舊釋未  
備附庸並錄微子之鼎證憲恪之同文安陽之幣釋鉞坑爲  
一字荀爲盛矢之器升爲方罍之斧凡所剏獲信而有徵於  
是撰說文古籀補及字說若干卷君又謂古之璽節今之印  
章蔡邕獨斷已通尊卑之稱劉熙釋名更詳轉徙之訓周禮  
玉節判然不同卽墨古陶亦爲後出甄豐徵文但詳繆篆吾  
邱學古好言螭扁璠田通藝所論家璽椎輪之導未暢厥怡  
於是輯周秦以下官私諸印泥封撥蠟朱文爛然國邑大夫  
之名可補羣經偏旁假借之例亦關六義爲古印錄文若干  
卷君又謂良玉孚尹君子比德玉人所記追琢之制卽射剡

出素功無琢龍瓚雜色輕重爲差璧孔肉好用以起度裸瓚如盤有流前注又若琮以章地類車釭之中空圭可祀天惟終葵之爲首猶可見享頰之上儀證經傳之舊說而世之嗜者徒辨采色或賞雕鏤裘佩等玩無當大雅君乃審其矩度證以古誼律琯積黍適合鄭君之言葩瑤曲莖可驗張衡之賦爲古玉圖攷若干卷君又謂雍涼舊域樂石鱗萃弇州著錄時閱百年鄙君通道更益李禹真斷碑可媲美完摩厓之字題於百仞之上幽竈之文出於九回之淵先後所得拓本不啻千通方欲發凡起例集爲一編王事賢勞未遑卒業至於絹素點染神與古會衣紋樹色入姚最之畫品煙林墨竹有杜甫之詩意此又君游藝之餘因寄所託者矣方今天

鏡澄文地槃翕采氣調時祥禮平政成君以方召耆碩弭節  
漢南金薤列於燕寢銅華發於雕函楚公雷鍾鼎鼎連鼓之  
形曾侯宗彝隱隱能章之字朱明洞天訪神禹之祕文九真  
太守按谷朗之名翰至若袁滋季康唐虞石刻僅出有唐皆  
等自鄧夫文字之壽莫如金石是以爲此學者皆臻大壘君  
之藏器其文具在頌庸蔑歷幾同孔甲盤孟逢吉康彊更譯  
箕疇義訓

曾母丁恭人八十壽序

國家紹統披元揚靈飛繹述宣陰化訓流闡闢歲在甲午恭  
逢 慈禧皇太后六旬慶典維時曾君表比部太君丁太恭  
人年八十矣律中無射設帨之辰同鄉之官於京師者願得



一言爲壽昌熾先辱與比部交比部君有才子曰孟樸論學  
投分復訂忘年之契遂得聞比部君之善養志與太恭人貽  
謀之遠足以炤耀槐眉羽儀 椒掖夫周京式化稟祁僮之  
上儀虞訥觀型通烝乂之善俗自來太和之世瑞氣嘉生  
壺政穆宣 徽音照古必有合於賢明仁智辯通諸傳若中  
壘所稱嫻於女師嫻窈窕德象諸篇若惠班所述輔 醴化於  
娥臺贊 柔光於 姒幄明良之運旁逮笄珈綰綽之祥  
徵於彝鼎論仁議福海內蓋眇惟太恭人端操有蹤柔嘉維  
則傳將軍之易家本通經肄女史之箴少知習禮其歸我贈  
公口口先生也佐餞繼笄之敬饁田舉案之恭執蘩采藻之  
勤賦茗頌椒之令凡茲闔閭之行操彤管者孰不說而繹之

而昌熾以爲君子能勞後世善繼敬姜之訓百世以之自來  
折葵示警斷杼肄勤通儒蔚起必資賢母比部君終買之年  
卽有遠志太恭人謂山川登眺可備九能上國觀光足資聞  
見欣然治裝輟道神而遣之比部君遂與介弟君靜中翰同  
至京師巾車命駕長者倒屣成均鼓篋諸生斂手每當暄辰  
肅月步履相逐抽毫授簡賦應劉之妙詞攬環結佩締僑胖  
之雅契用能盍簪輦轂領袖敦槃一紙之出小胥競寫高會  
十日足繼平原太君無恙間絳幔之起居阿士能文守青箱  
之家學蓋其榮親也以令名旣而比部君有西堂之痛賦北  
山之詩梁公親舍望白雲而孤征潘岳閒居欣春日之載永  
虞山當尙朔之瘡有巖壑之秀紅豆一樹訪拂水之荒莊蒼

松十圍藏破山之叢剎板輿陟嶽如履坦途輕帆御風輒疑  
仙境於以怡顏養志節性延齡討菌枯以蠲疴煮蘘荷以撰  
食太恭人願而樂之未嘗不怡然進一觴也蓋其娛親也以  
勝境文字之壽莫如金石歐趙以來此學殆渺儀徵太傅開  
府兩浙哀集拓本彙爲一編吳越鄰壤不宜蓋關比部迺於  
定省之暇發憤蒐討蕭寺篝火梯百仞之簷幽竈耕犁出九  
回之深炎漢一石斷自潘乾孫吳諸碑作者皇象句曲館墮  
訪南朝之孤本鬱林觀壁捫東器之祕文又若新渝諸闕總  
持一碑楚金鼎臣之篆出土尙新前賢未見莫不最而錄之  
訂其異同桑梓文獻賴以不墜蓋其承親也以不朽之業比  
部君又以南阮北阮豐嗇容殊東裴西裴親疏待給仿高平

會食之義設希文贍族之田行葦敦本信宗法之未亡明棗  
薦馨溯祖功所自出 朝廷如禮官所請有義門之旌高行  
表梁母之間通德號鄭公之里易曰積善之家必有余慶書  
曰資富能訓惟以永年此仁人之利也亦賢母之教也蓋其  
奉親也以不匱之思夫劬劬色養聖賢所難孝乎惟孝是亦  
爲政比部脫屣物表撰杖家園返芰荷之初服萊綵承歡樹  
喬梓之芳型韋簾紹業孟樸觴辰玉映踔厲奮發張堪弱歲  
卽號聖童范甯學舍咸推顏子袁朗風教衣冠顧囑桓郁章  
句父子相傳聖善之貽其來遠矣方今 天子聖孝宙合清  
晏 倪天稱慶率土騰歡太恭人以鍾郝之名家際 唐虞  
之嘉會康彊純嘏享世大年 壽寓同登德門蔚起譜房中

之樂律應 鈞韶標林下之風德昭圖頌壽爲人瑞福自天  
申某等誼託維桑飫聞徽懿黃花晚節願傾益壽之觴萱草  
春暉敢上忘憂之祝

王母李太宜人八十壽序

越郡匯錢江之流枕鑑湖之曲巖壑奇秀士女昌丰天姥一  
峰與沃洲相並峙洞天石扁曜雲霓之夜光新昌縣圖披煙  
霞之奇藪其地上躔婺女之紀后土富媪三光昭明是以閩  
幃名彥令德壽豈珥彤所紀炳然著顯在昔朱育正旦之對  
下及賢女柳朱崔李與車軀而並述婆娑習舞盱江孝娥之  
碑顚顚作歌鼓山思女之什並爲詞章之懿累徵典錄吾友  
王君亦安早秉慈誥寄跡塵市典午望族承逸少之緒於越

先賢讀計然之書光緒辛卯相遇嶺嶠昌熾舊本越產樂溯  
先何桑梓舊聞述謝客之往跡荔蕉飮座操郗超之土音清  
談旣傾輒盲母教稽山之下有親舍焉白雲千里邈然神往  
蓋其太君王老伯母李太宜人婉婉詒謀康彊逢吉公父文  
伯之母能述義方京陵郝氏之家世稱禮法越歲甲午爲太  
君八十壽辰虞顯名族弦譚舊姻剡溪路曲扁舟挂席而來  
會稽山陰列坐流觴之次相與鞠脰登堂稱述淵懿而亦安  
以昌熾備員史館粗識中壘頌圖之義寓書都下屬爲泚導  
夫圓曜麗空稟如水之徹質慈雲沾野猶在山之初心太君  
在室之初卽稟齋夔之性其母孺人沈疴在牀綵懷垂盡太  
君旁皇束帶聽三商之未終涕泣焚香呼九天以爲證霜刃

一揮臂血濡縷和肉屑糜以代湯七卒使顏景奄忽迴於魯陽之戈積誠感通無俟秦緩之術是謂天性之篤宜詳者一暨歸我浩如先生也重親在堂雍睦無閒劉殷一門之內七業俱興張公五世之居百忍爲寶鄭君旣及見小同劉歊亦夙稱曾子太君介兕思柔奉鳩式敬問昌歟之嗜洗手而調羹肆厠廁之勤椎髻而操作寢門初興祖庭環築威姑導前新婦拜後杖屨之撰見者以爲神仙尊盃之銘寶之及於孫子是謂人倫之美宜詳者一浩如先生棄儒服賈負郭可耕鮮千頃之田築臺所直僅百金之產仰事俯畜藉飲內助太君米鹽量鼓綜理微密蓄魚之欺廉及池籩剗羊之奠謹茲輝庖往往紡軋月落機絲未開竈陞煙寒春糧待繫束脩之

脰俾孺子以從師薄笨之車效少君而共挽是謂中饋之勤  
宜詳者一太君家本儒素父爲大師伏女傳孔壁之經韋母  
通周官之義是以亦安昆季趨庭之暇飫聞德象雖居一閭  
之塵不忘三遷之訓操行清粹士流不逮柳玼家範摺紳所  
稱晏嬰楹書弓裘克紹湖海之士攬環結佩嚮蔬留賓識季  
偉之色養束帶伏閣聞夏侯之家規蓬巷自蔽門多長者之  
車苔岑可通名挂通人之籍是謂貽謀之善宜詳者一若夫  
溫拯窮巷汎濫甘泉恤同巷之績則發緯可安分異宮之財  
則社觴毋犯翳桑餓夫拜橐籥之餘賜桃斐瘳女分稟粟之  
家財割刲漏澤以仿官塏酌疏上池而調經劑雖瓶罍之告  
空猶釵鈿之婁斥是謂任卹之誼宜詳者一西竺經典闡明



往來之旨南朝修士皈依止殺之文刀砧在前殼鯨非憫是以君子貴遠庖廚太君推愛人之心以戕物爲戒往往梯水渡蟻開窗放鵬流水長者廣養魚之方痴僕丈人棄承蜩之技忘機之鷗遵海渚而能馴避色之雉共山梁而欲巢是謂慈惠之師宜詳者一夫太和旁溢卽爲五福之徵至德遠騫可召千人之祝是以太君筭總之歲清羸多病今茲八艷神明轉彊魚勞不頽鳩扶益健假寐炊許神識便湛危坐竟日容止儼若筦子云寡疾難老荀卿云美意延年洵所謂區明風烈昭我管彤者乎今者施帥令辰循陔上壽鳳膠麟脯添海上之仙籌鼉鼓龍絲譜房中之樂職昌熾遠隔人海末由奉觴敢援奚斯之義式頌闡微聊爲莊舄之吟庶光里乘

劉母顧太恭人壽序

明季士大夫以氣節相矜尙吾邑文文肅公湛持暨寶應劉練江先生皆東林之眉目也范滂張儉名在鉤黨江左之士奉爲職志練江德配韓太君六十壽文肅爲撰祝嘏之詞越今將三百年矣訪青瑤之別墅盪爲荒煙輯香艸之遺書已無長物而劉氏裘杼之緒巍然無恙貞修之謚論定於戢山義迹之詩寶藏乎蓼野端臨先生發明絕業簡策八寸述張侯之微言輶軒四方刊揚雄之奇字我山同年練江君之九世孫而端臨先生之曾孫也光緒丙申蕤賓之月爲我年伯母顧太恭人七十施帥之辰先期來徵文曰文肅子邑人也吾母之系出自吳郡子其爲文以繼道南之休烈以慰吾母

新豐之思昌熾不敏無當前賢而太恭人煒彤之範則不可  
無一言以介觴也自來周官世業絳幔傳經吳下名宗黃門  
著錄太恭人大父思亭先生儒林耆碩操尙質絕獻賦闕下  
哀然舉首潤州學舍別開校官之碑秀埜艸堂繼起詩人之  
坵詰嗣蘇人先生橫舍承歡過江流寓朱肱著活人之書逢  
萌列逸民之傳許慎之後有冲班彪之女名惠太恭人幼傳  
必學長習張箴女師德象之篇孝經閨門之訓莫不簡諒專  
精稊墮治熟其歸我年丈口口先生也并曰親操珩璜善下  
舉春廡下則望若神仙攬佩閨中則等於師友年丈偏親在  
堂夙嬰沈痾篋中蓄艾期七年而已遲枕畔飛蓬經三旬而  
未沐太恭人鷄鳴卽起三商未息燂潘請醢燂湯請洗沐梁

用櫛本修養之祕旨燥豆加盤亦袂除之故事又況靈蘭之  
典本乎世學按摩有術妙解乎折枝視聽無形遂工乎嘗藥  
卒使瞑眩竟瘳聰彊逾昔泔澁千金是名婦人之方拒枚寸  
匕可補神農之錄厥後蘇人先生擊楫渡江乘櫓避地滄桑  
小劫指東海以揚塵槁木形骸等南郭之隱几維時先生年  
八十而太恭人亦且六十矣綢綢色養白頭猶昔中幫厠膺  
視濯惟謹薦蘿同命依然孺子之嬉桑榆暮年幾忘半人之  
疾人謂太恭人素質清羸華顛烝孝流水不腐戶樞不蠹天  
鑒其孝神實相之年丈早通朝籍服官薇省蠡上不事翻然  
高蹈淮南招隱與青松以久要何安里居指白楊而爲號顛  
涯自放鷗鷺無猜觀聽所傾羔雁爭集太恭人並硯耦耕褰

裳惜隱每當扁舟共泛撫琴動操輒舉觴相屬曰青山可盟  
以爲息壤年丈由是貞期益劬樂詠彌振松楸勿翦誓墓田  
而可歸梨棗待鐫發楹書而流布旌閭兩世之典過庭一家  
之言遺書在篋覆瓿是思東甍不足華鎡婁斥至若桑海遺  
民乾嘉舊學茂陵藏山之業享帚同珍虞淵蹈海之徒披函  
如見雖復赫蹏小篆兵燹齟齬一字之值等於璆琳累世所  
貽奉爲裘治是以我山同年播染有資掃除俗學著書等身  
藉以娛親人海鍵關依然卻埽年丈同產三人負郭十畝寢  
邱之產棗餽纔給太恭人以爲推肥讓瘦馴行爲難異宮同  
財責在家督是以掉臂無聞吹壘式好築里服其惠心戚卹  
其行義故閭櫛玉文勤公姑之壻也詞臣建節家門鼎貴

太恭人歲時餽問訂盤互貽形迹纖介竿牘毋謁我山同年  
訕謔之歲卽有雋譽揚州孫韻武太守其父執也或諷以出  
試者太恭人以爲蒙泉潯沸盈科始進良玉韞匱待價而沽  
援兼山先生事以相勗而我山同年亦能服膺母教焮掌自  
勵先後受知宏偉君子東方郎潛自承明而起家西域典屬  
通棘寄之重譯迺知狷舉之鵠無假夫羽毛絕塵之驥自逢  
乎盼睽我山有庶母弟曰奉璠太恭人教之也平均如壹側  
生旁挺未聞異畝爲嫌大擲小疵豈有偏絃之患至於任昉  
孤兒矜其葛帔蘇季窮士資以春糧縻卹緯而相依婢覆羹  
而輒恕笄珈小善難可覩縷今者俊風盪閭慶雲颺呂鳳膠  
麟脯新添海屋之籌鼉鼓龍絲遙上華堂之祝昌熾鞠膳登

堂侑觴末座貞蕤喬葉溯竺塢之前聞桂窈荔芬譜唐山之雅樂竊謂中壘之傳長康之圖仁智賢明宗風未墜昌熾於此將以攷故家之文獻尋社事之始末補容甫廣陵之對訪退居怡性之篇范史黨錮與列女並存臨川世說雖賢媛亦錄如我太恭人者蓋無媿通德之家風清流之世澤矣敬告綦母鏤諸彤史

陸春江先生六十壽序

古無生辰上壽亦無循吏之目淑問一章見於魯頌而先之以永錫難老君子樂只頌豈弟之令聞士女穀我報坻京之介福漢之龔遂黃霸並致高位享大年誠以天視民視天聽民聽衢童之謠質於華封之祝田峻之慶神於卷阿之音觴

豆之典雖曰引年亦風有位蓋馨宜者降福之符不懈者保  
身之哲國之番良鄉之耆儒士之老師民之慈父豈非錫羨  
之嘉祥祝延之盛軌歟歲在著雍律中姑洗爲我春江夫子  
大人六十攬揆之辰維時海市洞開飛輪飆集神倉儲峙綰  
轂爲勞我師於飛芻輓粟之餘兼司典屬承厝火積薪之後  
深切紆籌東吳粳稻循遼海而轉輸西域梯航叩重關而互  
市補牢未晚何慮乎亡羊執筮不驚先除夫害馬白屋孤寒  
議於畔官誦法周孔毋熒異端公之教士如歐如韓維魚之  
眾謠於衢巷百昌棣通播茲嘉種公之勸農康年作頌商歌  
於市祝公鯢齒青苗國息維政之祉公示大信皦日可矢吏  
迓于津千帆雲屯黃頭權郎太倉陳因公之闔澤投醪飲醇



于斯時也賓從雜遝簪裾充庭吏民歡愉舂鞬空巷昌熾受  
知匠門自愧棄材薄宦京邑逖聽嘉惠竊聞下令流水之原  
深維景行高山之義眷言東里慈惠之師謹援南山臺萊之  
例夫登崑崙者溯切雲之崔巍游濛汜者觀出日之爛朗我  
師朱幡占族青領起家當登堂鼓篋之年卽避地乘櫬之曰  
誅茅結屋長者之駕頻來負米登門游子之踪靡定菰蘆微  
服憔悴而過江松檜崇封閒關而負土百六運回湖山無恙  
雞籠絳帳謁次宗之精廬馬矢縹囊補宛委之墜典每當湖  
上墊巾抽舫談藝閣中爇燭公庫校書羔雁交辟禮重夫三  
薰騏驥上襄名馳夫千里都亭縞紵盡君廚之勝流橫舍敦  
槃登僞造之上選旣擢甲科出宰江左夫蓋世之略兼濟爲

難往往清裁貴令鴻術瞻聞或坐嘯如宗資或臥治如汲黯  
殷生以束閣見譏謝客惟游山爲樂登場舞袖遽歎郎當易  
地鉛刀卽形鈍置而我師則以予惠字毗以公廉察吏以哀  
矜折獄以通變濟時平生宦績江淮爲最一宰山陽三臨末  
下儺從所至威棱先翔條教不苟顙若畫一董令強項貴游  
屏跡邴相惠心神明交稱豪右強宗聞左輕俠咸奉三尺莫  
敢首鼠至於警探九懲威悅萑蒲之藪策騎校以先驅蘭芍  
之鄉縛鳩媒而待理可謂寬猛兼資經權互用者矣而我師  
以爲司空城旦非致君之上猷保障繭絲僅當官之期會興  
利要規之百世折衝可制夫四夷自夫景教流行異族橫噬  
披髮伊川之野抵足臥榻之旁巖巖岱宗可假夫祊田黼黻

周原竟參夫戎索金陵報恩寺者甌脫之遺墟招提之別館  
亦卽流傭之寄廛也彼族旣視若閒田奸民復倚爲利藪鵲  
巢方慶夫鳩居虎威亦同乎狐假封豕荐食踞上座而氣矜  
市虎訛言伏蕭牆之禍亟我師知安危之頃閒不容髮曉以  
大義謂眾志不啻成城折以盟言謂載書猶存息壤設官所  
以庇民喧賓豈能奪主卒使夜郎自大俯受約束海內祇祠  
揭櫟林立濱江百里不聞變夏是則中流砥柱障狂瀾於旣  
迴曲突徙薪息燎原於未兆滬濱通商號爲難治公之蒞官  
席未暇煖然於指鹿之奸教猱之訟平情論斷執理抗爭苟  
跖犬之吠堯必罪人之斯得不因中外之歧稍分左右之袒  
詩不云乎柔亦不茹剛亦不吐我師有焉班酈釋地澹百川

之沈災鄭白通渠開千頃之沃壤南都輿區羣山外峙渡江  
以北大河前橫平原環拱若高屋之建瓴涓流灌輸猶中衛  
之設勺或自利而鄰可爲壑或不耕而里亦成墟比歲不登  
井閭蕩析我師閱其昏墊廣設方略經緯上下提水道之綱  
纒沐往來乘山行之纒疏泉鑿寶槌石城梁趙昌置常稔之  
塘傳祗造沈榮之堰昔之礪礪彌望膏腴泰州斜豐港者當  
濁河之衝以長堤自衛蟻潰一孔鼃沈萬炊我師召集流亡  
鳩工畚鍤河上之役適值乎宣房道旁之謀深戒乎築室登  
孟城而望茭舍猶存洩甃社之流歸墟盡奠若夫深究治原  
鏟除常格軫恤民隱宏獎士流禮義以張國維忠信以振敵  
愾尤爲正本清源之治不徒奉行文法之爲宜乎譽重典城

勛高書展驥足遙騁非百里之才豸華游膺合六條之格中  
興碩輔並世偉人莫不倚若長城資其輜局借箸前籌幕府  
何妨長揖登車攬轡中原有待廓清微管之略志在匡時剡  
牘交陳超除不次陳臬敬事登臬蘇之遠猷峙糧遄行顯甫  
申之良翰今者清風浴叻慶雲溫閩繡衣乘轡蓋續聞於

禁中綵服稱觴蕃禡迓於幕下我師功成不居德隅自抑向  
敏中能耐官職厘念時艱魏其侯盡謝賓僚超然燕處然而  
文翁雅化播樂職於中和計相助賢登神明之上壽自來述  
德非僅祈年昌熾等或京曹著籍或民社濫竽不舞麇麇永  
言綽綽生徒撰屨幸隨桃李之班父老持輪同被梓桑之蔭  
鄭鄉依通德之門魯殿仰靈光之宇維祺壽考喜占吉戊之

年于翰旬宣適協生申之頌

汪邵亭侍郎六十壽序

昌熾讀卷阿之詩而疑焉成王令辟召康公賢臣也而其言曰伴奭爾游矣優游爾休矣又讀烝民之詩而疑焉袞職有闕惟仲山甫補之而其言曰旣明且哲以保其身夫以泰交之運羣賢彙征明明在朝穆穆布列而顧託色斯之見幾忘匪躬之盡瘁蓋利器以盤錯而益堅大任必遲徊而後降夫螻屈者龍見之徵也狼跋者鴻飛之朕也空谷遁思卽嘉客之縶維草廬坐嘯有名世之經略自來君臣之際不以形跡巍巍九重貌合而神離依依三宿跡往而心繫魚水之契可相忘於江湖鶴誓之徵每再起於鄉里是以鄴侯顧問黃閣

不必延登謝傳圍棋青山豈終長往碩果不食與茅茹而共  
升喬木猶存爲苞桑之所繫貞下會見起元隆中適資養晦  
如吾師卽亭夫子者其殆國之番良鄉之耆儔逢掖之宗師  
搢紳之職志乎歲在戊戌日躔鶉火之次爲吾師六十攬揆  
之辰芰荷遂初之服舞綵交輝枌榆息蜡之觴引年並重自  
去國之日數杖朝之年世變蜩蟬清流艱疏品題厨及海內  
謚爲至愚紹述熙豐朝右恣其新說望門擁篲後進之靡依  
曲突徙薪前言之盡驗而況昌平里儴童冠從游高密門牆  
生徒著錄篠簜使節陪駢征之後車蓬萊道書問雞次之逸  
典如昌熾等幸傳衣鉢久列車茵可無一言以爲喤引回憶  
北闕抽簪東門祖帳譙樓風緊獵獵卷旆之聲蕭寺日斜黯

黯籠紗之句吾師莽蒼適野甫息勞薪薄笨歸裝惟存詩草  
觚棱未遠瞻鳳闕而徘徊觴榼同來送騾綱之馭還當  
斯時也惓惓憂國之思惘惘臨歧之別隨會去秦贈繞朝之  
策仲尼適衛執冉子之鞭匪風之思惻怛於中心履霜之幾  
躊躇於先事以爲波流弟靡去滔滔而不還泉竭自頻憂悄  
悄其何極亡羊猶切於補牢瞻烏莫知其止屋由今思之不  
過一彈指頃耳朝市沸羹門戶水火典型棄如弁髦政令紛  
如棋局重臣舊學冠端禮之巨碑游士說林參邇英之講席  
番番黃髮悠悠蒼天典籍之劫遠過於秦燔藩籬之爭自較  
其墨守發憤者指東海以自明失職者傷北門之終窶迺知  
勛賢者國家之元氣名德者士類之歸墟江漢朝宗崆峒戴



斗斯人不出天下喁喁而吾師方且徜徉林壑流浪湖山仲  
長樂志之論孝標栖隱之文季真逸老之堂文元昭德之第  
葑田別業菱芡爲糧栗里新居松菊無恙南國紅豆親移選  
佛之場商山紫芝從授谷神之訣往往柳栗尋山笥簪釣水  
神宮曉霞發金庭之祕文荒塢香雪結銅井之游侶東澗詩  
壇西泠畫舫飛泉瀉紅攀拂水之簾景漪盪翠話斷橋之柳  
所謂塞翁失馬焉知非福鴻飛冥冥弋人何篡蕉鹿之夢已  
付之淡忘菟裘之營自娛其清福夫以吾師早踐清華游登  
密勿皇華驛路關吏爭迎舍菜宮牆畔官戾止周秦古器續  
弇山之舊文齊魯諸生甄鄭鄉之絕學滕王高閣先召賦才  
尉佗荒城遠尋文軫夾袋延攬卽爲薦鶚之書輅軒紀行盡

入驂鸞之錄至若陟宮坊參講幄成均教胄訂首善之宏規  
清祕述聞備 恩榮之 異數 朝廷推燕許之文章瑱院  
視歐蘇爲風氣振拔孤寒昌明古學舉凡帖經程義深通賈  
服之書作賦摩空步驟班楊之列莫不入其彀中出之彀下  
自登九列兼領三司簡書按簿乘傳而出都亭樽俎折衝籌  
筆而清邊徼宣室密陳移日而未罷官舍傳置浹歲而屢遷  
天生李晟以爲社稷帝見汲黯有異公卿可謂遭際稽古之  
榮發擢匡時之略知足不辱循苦縣之至言詢謀罔愆俟蒲  
輪之優詔方謂優游 堯舜之世往來吳越之間德星之占  
方聚於林下皎日之志可誓於墓前不知天視民視天聽民  
聽淪胥之運有待於手援 簡在之誠要可以心喻大廈所

貴於共支名園未宜以獨樂詩曰膺力方剛經營四方禮曰  
君命召不俟駕敬爲吾師誦之然則樹聲以長世訓道以修  
齡筦子云寡疾難老荀卿云美意延年猶爲黎收之例言親  
炙之私祝夫吾師一身之進退 天步安危人才顯晦莫不  
因之則其單厚罄宜卽天保所由孔固康彊逢吉卽皇極所  
由訓行英賢間世而一生功業百年而始定唐虞之際稷契  
尙矣商之咸陟周之方召並享大年佐成中興之業後之視  
昔宜有同揆高山景仰竊附游夏之班維嶽降生願上甫申  
之頌

奇觚廣文集三卷外編一卷爲同邑 年丈葉鞠裳先生遺  
著 丈與 先君子羈串論交誼同昆弟盤溪修志海虞校  
書出共扁舟入同硯席旣又同膺鄉薦同官京朝道義切磨  
奇疑賞析數十年如一日古所謂合志同方營道同術者庶  
幾近是 先君子先 丈卒二十餘年而新周故宋諸邪說  
萌芽有年當時縱論時事若已逆料及之故 丈一視隴學  
卽稱疾不出 國變以後寄居海濱不與人接待清無日賁  
恨長終風節與王厚齋胡身之相伯仲著述甚多所已刊行  
者以藏書紀事詩語石兩種爲鉅今 潘仲午表叔又就遺  
稿中編成文筆四卷付之剞劂以 烈自幼卽奉教 丈側屬  
繫一言 烈惟 丈之學問人所共知無俟贅述惟其植品之

篤謹持論之和平勵節之高潔有非並世文人所得而比者  
敢述其涯略以告讀者不自知其僭且妄也歲在辛酉孟夏  
之月上澣年家子王季烈跋